



ANTUN JA AIMARIN SIRKUS

Muistelus

Kirjoittanu: Pirjo Paavalniemi 2007

PIIRROS ULRIKA KURKIMÄKI

Anttu-hiiri ja Aimarishiiri asuthaan pienessä, somassa pesässä. Pesä on mettän laidassa. Yhtenä päivänä Anttu ja Aimari aiothaan laittaa ylös sirkusesityksen. Het maalathan suuren panterollin, missä lukkee suurila puustaaviila: TERVETULEMAA ANTUN JA AIMARIN SIRKUKSHEEN!

Nyt Antula ja Aimarilla on suuri, fini panterolli – finimpi ko kelhään muula.

Mutta sitte Anttu hoksaa, ette sirkuksessa häydythään tietenkki olla kans sirkusseppii, eikä heidän sirkuksessa ei ole vielä yhtäkhään sirkusseppää!

Justhiinsa silloin loikkii jänes Antun ja Aimarin pesän sivvu ja näkkee panterollin.

– Mikä se sirkus oikhein oon? kysyy jänes Aimarilta.

– Sirkus oon semmonen esitys, missä sirkuselläimet näytetään kaikenlaisii konstii, mitä het saatethaan. Mutta meilä ei ole

yhtään sirkusseppää meidän sirkuksessa, selvittää Aimari.

– Mie halluun myötä teidän sirkusheen, sanoo jänes.

– Mitä semmoista konstii sie saatat, mitä muut ei saata? kysyy Aimari jänekseltä.

– Mie olen seppä hyppäämhään. Mie olen maailman paras hyppääjä. Mie hypin kauvemmin ko kukhaan muu, praamaa jänes.

– Sitte sie kyllä saatat olla myötä meidän sirkuksessa, tuumii Aimari. Anttu antaa jänekselle sirkuslakin, ja niin jänes oon kans ihan oikkee sirkusseppä.

Karfuu kans mennee Antun ja Aimarin pesän ohi ja näkkee panterollin. Karfuu tömistää Antun ja Aimarin tykö.

– Mie kans halluun myötä teidän sirkusheen, murahtaa karfuu.

– Mitä semmosta konstii sie saatat, mitä muut ei saata? kysyy Aimari karfuulta.

– Mie olen maailman vahviin, vahvempi ko kukhaan muu, vastaa karfuu yllpeenä.

– Sitte sie kyllä saatat olla myötä meidän sirkuksessa, tuumii Aimari. Anttu antaa vielä karfuule sirkuslakin, ja niin karfuu oon kans aivan oikkee sirkusseppä.

Samassa lintu lentää Antun ja Aimarin pesän yli ja näkkee seki fiinin panterollin.

– Voi ko se olisiki soma olla sirkuslintu! Mie kans halluisin myötä teidän sirkusheen, liverttää lintu Antule, Aimarille, jänekselle ja karfuule.

– Mitä semmosta konstii sie saatat, mitä muut ei saata? kysyy Aimari linnulta.

– Mie saatan lenttää kerkkeela, korkkeemalla ko kukhaan muu. Ja sitte mie saatan tehdä ilmassa kiekuraa, koukeroita ja vielä piruettii, sirkuttellee lintu ja pörrää ilmassa.

– Sitte sie kyllä saatat olla

myötä meidän sirkuksessa, tuumii Aimari. Anttu antaa vielä linnule sirkuslakin, ja niin lintu oon kans ihan oikkee sirkusseppä.

Mutta sitte jänes, karfuu ja lintu kysythään Antulta ja Aimarilta:

– Mitä semmosta konstii tet saatatta, mitä muut ei saata?

Anttu ja Aimari hämmästythään. Sitä het ei ole edes huntteeranneet.

Sitte Anttu hoksaa:

– Met saatama Aimarin kans tehdä maailman parhaimpii sokkeripilvii ja muita sirkusherskui!

Kaikin het taputethaan Antun idealle, ja Anttu ja Aimari saahdaan kans sirkuslakit. Nyt Antun ja Aimarin sirkuksessa oon maailman finein panterolli, maailman sepimät sirkuselläimet ja maailman herskulisimmat sokkeripilvet. Viimen het saatethaan laittaa ylös maailman parhaiman sirkusesityksen.